

SCRIPT OF MORNING GOJRI NEWS BULLETIN 9OCT 1015 HRS

مارننگ گو جری نیوز بلیٹن مورخہ 9 اکتوبر 2025

یوہ آکا شوانی جموں ہے عبدالرحمان تیں خبر سُنو۔

HM JK SECRETARY

مرکزی وزیر داخلہ مات شاہ اج نویں دلی مانہ ایک اعلیٰ سطحی میٹنگ غی صدارت کرینگا جس مانہ جموں کشمیر مانہ حفاظتی صورتحال غو جائیزو لیو جے غو اس میٹنگ گو مقصد حفاظتی ایجنسیاں غے بشکار ہم آہنگی نانہ بدھانو تے پورا مرکزی زیر انتظام علاقہ مانہ چل رہیا انسداد دہشت گردی اپریشن غو جائیزو لینو ہے لیفٹیننٹ گورنر منوج سنہا تے داخلہ معاملات بارے وزارت غا اعلیٰ عہدے داراں غے علاوہ خفیہ نیوز فوج سی آر پی ایف، بی ایس ایف تے جموں کشمیر پولیس غا سنئیر افسراں غی وی اس میٹنگ مانہ شرکت متوقع ہے چیف سیکرٹری سمیت جموں کشمیر غا اعلیٰ عہدے دار تے دوجا سنئیر افسر اس میٹنگ مانہ شمولیت بارے کل شام دلی پُچ گیا ہیں توقع ہے جے وزیر داخلہ امت شاہ جموں کشمیر مانہ امن واستحکام نانہ برقرار رکھن واسطے ایجنسیاں غے بشکار مضبوط تعاون ور زور دینگا۔

DY CM I&C REVIEW

نائب وزیر اعلیٰ سریندر چودھری نے اس گل ور زور دت وے جے قواعد غے تحت درخواست دہنگاں غا معاملات غی صحت سنگ فوری پیروی کی جے تانجے ترغیبی سکیمیاں گا فائدہ بلا تاخیر ہر مستحق تک پُچ سکیں نائب وزیر اعلیٰ سریندر چوہدری نے ان گلاں گو اظہار محکمہ صنعت و تجارت کشمیر غا کم کاج غی کارکردگی گو جائیزو لین بارے ایک میٹنگ غی صدارت کرتا واں کہی نائب وزیر اعلیٰ نے صنعتی تے بنیادی ٹھانچہ غا منصوبیاں غی حیثیت تے ویلے سر عمل آوری غو وی جائیزو لیو تانجے یوہ یقینی بنایو جاسکے کہ وی شفاف تے موثر طریقہ سنگ کم کریں انہاں نے متعلقہ افسراں تے ذمے دار عہدے داراں نانہ کہیو جے وے پروجیکٹاں غی ویلے سر تکمیل ناہ یقینی بناویں سرمایا کاراں واسطے دوستانہ ماحولیاتی نظام بناویں کاروباری افراد غی حمایت کریں تے بہتر تجارت و صنعتی ترقی واسطے پالیسی بناویں۔

DAR SARAS MELA

دیہی ترقی تے پنچائتی راج غا وزیر جاوید احمد ڈار نے سرینگر غا شیر کشمیر پارک مانہ کل سارس میلہ گو افتتاح کیو ہے جس مانہ پورا ملک تیں دیہی خواتین غا اپنی مدد آپ گروپ غی دستکاری تے مصنوعات غی نمائش کی گئی اس موقعور بولتا واں وزیر موصوف جاوید احمد ڈار نے کہیو جے سارس میلو دیہی خواتین کاروباریاں واسطے اپنی صلاحیتاں تے ہنر غو مظاہرو کرن غو پلیٹ فارم ہے جموں کشمیر دیہی گزر بسر مشن جے کے آر ایل ایم غی طرفوں منعقدہ اس میلہ مانہ 13 ریاستاں تی 2 سو تیں زیادہ اپنی مدد آپ آلا خواتین گروپاں غی شمولیت غے علاوہ جموں کشمیر غا تمام ضلعان غی طرفوں وی سٹال لایا گیا۔

SAKEENA RECRUITMENTS

وزیر صحت سکینہ اتو نے صحت سماجی بہبود تے تعلیم محکماں مانہ بہرتی غا عمل غو جائیزو لیو تاخیر ور تشویش ظاہر کرتا واں کہیو کہ خالی آسامیاں جلد پُر کی جیں تاکہ عوامی خدمات بہتر ویں۔ انہاں نے یاه گل سروس سلیکشن بورڈ غا سنئیر افسراں غے نال جائیزہ اجلاس غی صدارت کرتا واں یاه گل کہی۔

SATISH IMC

آئی ٹی گا وزیر ستیش شرما نے کہی و کہ جموں کمشنر مانہ نوو ڈیجیٹل دور شروع ہو گئیو ہے بھارت نیٹ پروجیکٹ غے تحت ہزاراں دیہاتیاں نانہ فائبر کیبل تیں جوڑیو جارہی وے تاکہ شمولیتی تے محفوظ ڈیجیٹل نظام قائم وے۔

DIR TOURISM PARAGLIDING

محکمہ سیاحت جموں غا ڈائریکٹر ڈاکٹر ویکاس گپتا نے کل جموں غے نیڑے ایتھم مانہ پیرا گلایڈنگ پائلٹاں واسطے 6 روزہ تربیتی کورس غو افتتاح کی وے اس تربیتی پروگرام گو انعقاد کوہپیمائی تے متعلقہ کھیڈاں بارے اٹل بہاری واجپائی ادارہ منالی ہماچل پردیش غا 2 ماہر تربیت کاراں غی نگرانی مانہ کی و جارہیو ہے اس قدم غو مقصد مقامی پیراگلایڈنگ پائلٹاں غی تکنیکل تے عملی مہارتاں نانہ بدھانو ہے تانجے انہاں نانہ 17 اکتوبر 2025 تیں بیر بلنگ ہماچل پردیش مانہ شروع ہون آلا پی 4 تربیتی پروگرام بارے مشق کروائی جاسکے اس موقع ور بولتاں واں ڈائریکٹر محکمہ سیاحت جموں نے جموں خطہ مانہ مہم جوئی سیاحت نانہ فروغ دین واسطے محکمہ ور زور دتو۔

DM POONCH BORDER MGT

ضلع مجسٹریٹ پونچھ اسوک کمار شرما نے کل موثر سرحدی انتظامیاں ضلع سطح غی سٹینڈنگ کمیٹی یعنی ڈی ایل ایس سی غی ایک اہم میٹنگ غی صدارت کی میٹنگ مانہ کنٹرول لائن غے نیڑے علاقہ مانہ بنیادی ٹھانچہ غی ترقی غی رفتار تیز کرن تے موجود حفاظتی انتظامات غو جائیزو لیو گئیو میٹنگ غے دوران اس گل ور وی زور دتو گئیو جے سرحدی علاقہ مانہ بسن آلا سول لوکاں تے حفاظتی دستاں بشکار تال میل و ہم آہنگی نانہ مزید مضبوط کی و جے میٹنگ مانہ بولتاں واں ضلع مجسٹریٹ نے سرحد ور بنکر غی تعمیر بجلی سپلائی صورتحال پانی سپلائی تے دوجی سہولیات غی حیثیت گو مربوط جائیزو وی لیو۔

JMC COMM

جموں میونسپل کارپوریشن غا کمشنر ڈاکٹر دیوانش بادو نے کل گورکھا نگر شمشان کھاٹ غو جائیزو لیو کیونجے دریائے توی مانہ حلیہ سیلاب غی وجہ سنگ ات کافی نقصان ہوو تھو۔ جموں میونسپل کارپوریشن غی طرفوں ات فوری طور مشنیری پیج غے ملوہ نانہ صاف کروایو گئیو تھو۔
